

# Long wanem as mipela mas i stap aninit long Jisas?

**Planti manmeri, long tingting bilong ol, ol i mekim dispela kain tok, “Long wanem as mipela mas i stap aninit long Jisas.”**

Orait, yu skelim dispela askim na yu bekim.....

Dispela graun yumi stap long em, em bilong husat? Em i graun bilong yu o em i graun bilong Jisas?

Tok Bilong God i tok olsem,

*“Krais i bin wokim olgeta samting. Em i bin wokim olgeta samting long heven na long graun. Em i bin wokim olgeta samting yumi inap lukim na olgeta samting yumi no inap lukim. Em i bin kamapim olgeta king na olgeta kantri king i save bosim, na Em i kamapim olgeta gavman, na olgeta bikman, na olgeta man i gat wok bilong bosim ol samting. Em i bin wokim olgeta samting na olgeta samting em bilong Em yet. Krais i stap paslain long olgeta samting na olgeta samting i save stap inap long strong bilong Krais tasol.”* **Kolosi 1:16-17.**

**Tasol, yumi no save bilipim dispela tok tumas, a?**

Sapos yumi bilipim tru dispela tok, ating yumi inap **harim** tok bilong Jisas na yumi inap i **stap aninit** long Em na **bihainim** olgeta tok Em i bin tokim yumi. Tasol, yumi no mekim olsem.

Sapos yumi bilipim tru dispela tok, ating yumi inap amamas long Jisas i bosim olgeta samting long laip bilong yumi. Sapos yumi bilipim tru dispela tok, ating yumi no inap les long tok bilong Jisas na yumi no inap les long bihainim Em na yumi no inap les long Em i bosim yumi. Yumi bai tingim olsem, bihainim tok bilong Jisas Em i nambawan samting stret long laip bilong yumi. Tasol, yumi no save tingim olsem.

## **Yumi mas klia olsem, pasin yumi mekim i putim bel bilong yumi long ples klia.**

- Yumi strong tumas long bihainim pasin bilong ol tumbuna bilong yumi.

Yu save, long laip bilong yumi, kastem pasin em i bikpela samting na i paslain long tok bilong Jisas. Long wanem? Yumi save tingim olsem tok bilong ol tumbuna i tru na tok bilong God em i stori bilong ol waitman tasol. Olsem na, yumi save bihainim ol kastem pasin bilong yumi tasol, na wei bilong Jisas i stap samting nating tumas long laip bilong yumi.

- Yumi save bilipim na trastim toktok ol lain bilong yumi yet i mekim.

Olgeta taim yumi pas long lain bilong yumi yet, na yumi no save trastim toktok bilong ol narapela lain. Olsem na, maski ol lain bilong yumi i kapsaitim tok bilong Jisas o nogat, stil yumi save bilipim na trastim tok bilong ol. Maski ol i karim wanem tok i kam long yumi, stil yumi save bilipim na trastim ol na Tok Bilong God i stap olsem samting nating.

- Yumi stap aninit long lek bilong yumi yet na yumi save bihainim laik bilong yumi yet.

Yumi klia pinis long planti tok bilong Jisas, tasol yumi save givim baksait long dispela tok na yumi bihainim laik bilong yumi yet. Planti taim yumi ai klia na yumi sakim tok bilong Jisas. Long wanem? Yumi les long bihainim Em. Yumi strong tumas long bihainim laik bilong yumi yet. Olsem na, yumi giaman taim yumi tok, "Mi save bihainim Jisas."

- Yumi save tingim ol narapela samting i nambawan samting.

Yumi save tingim graun bilong yumi i nambawan samting. Na yumi save tingim pik bilong yumi na meri na mani na kopi na ol narapela samting bilong yumi i nambawan samting. Yumi tingim ol dispela samting i winim tok bilong Jisas.

## **Yumi save givim baksait long Jisas.**

Sampela bilong yumi i stap gutpela manmeri. Na sampela bilong yumi i no stap gutpela manmeri tumas. Tasol yumi olgeta i gat bikpela tingting long bosim laip bilong yumi yet. Yumi laik bihainim laik bilong yumi yet. Olsem na, yumi save

givim baksait long Jisas na yumi no stap aninit long lek bilong Em na yumi no laik Jisas i bosim olgeta samting long laip bilong yumi.

Na dispela pasin i rong olgeta. Dispela pasin i bikpela asua stret. Long wanem?

Yumi tok pinis, Jisas Em i oana na bos bilong dispela graun na long yumi tu na long olgeta samting yumi save yusim. Olsem na, long dispela as yumi mas i stap aninit long Jisas.

Tasol, yumi no stap olsem. Nogat. Yumi givim baksait long Jisas na yumi bihainim laik bilong yumi yet.

### **Sapos yu tanim bel long pasin bilong givim baksait long Jisas, orait Jisas bai fogivim yu.**

Sapos yu tanim bel na yu stopim dispela pasin bilong givim baksait long Jisas, na yu go bek na yu stap aninit long Jisas, na yu lavim Em na yu bihainim Em na larim Em i stap bos bilong olgeta samting long laip bilong yu, orait Jisas i no inap mekim birua long yu, nogat. Em bai fogivim yu.

Na long wanem as Jisas i ken i fogivim yumi? Pe bilong sin em i dai na lus long hel. Olsem na, long wanem as Jisas i ken i fogivim yumi long sin bilong yumi?

Jisas i bin mekim wok long diwai kros bilong tekewe sin na tekewe kot bilong sin na tekewe pe bilong sin. Jisas yet i kisim pe bilong sin bilong manmeri i tanim bel na i kam long Em na i bilipim na trastim dispela wok bilong Em na i bihainim Em.

Yu mas klia olsem, Jisas i no inap fogivim yumi nating, nogat. Em i bin mekim bikpela wok long diwai kros bilong tekewe olgeta samting bilong pe bilong sin, na long dispela as tasol Em i ken i fogivim yumi taim yumi tanim bel.

*“Tasol, yupela mas klia olsem, Pikinini Bilong Man i gat namba long dispela graun bilong tekewe (fogivim) sin.”* **Mak 2:10.**

*“Krais yet i hangamap long diwai kros na Em i karim sin bilong yumi long bodi bilong Em. Em i mekim olsem bai yumi lusim wei bilong sin na yumi bihainim wei bilong stretpela pasin. Em i bin kisim bagarap bilong oraitim yumi.”* **1 Pita 2:24.**

*“Tru tumas, Mi tokim yupela: Man i harim tok bilong Mi, na i bilip long God i bin salim Mi i kam, em i gat laip i stap gut oltaim oltaim. Em bai i no gat kot. Nogat. Em i lusim sait bilong i dai na em i kamap insait long laip pinis.”* **Jon 5:24.**

Olsem na, sapos yu tanim bel na yu go bek gen na yu stap aninit long Jisas, na yu lavim Em na yu bihainim Em na larim Em i stap bos bilong olgeta samting long laip bilong yu, orait Em bai fogivim yu na yu bai stap laip.

**Tasol, sapos yu no laik tanim bel na bihainim Jisas, orait bihain yu bai kisim bagarap long han bilong Jisas.**

Sapos yu bihainim laik bilong yu i go yet na yu stap aninit long lek bilong yu i go yet, orait bihain yu bai kliia olsem, yu bin givim baksait long wanpela bikpela bikpela Man stret. Tingim! Jisas i bin wokim yu. Na tu, Jisas Em i jas bilong yu. Ating i no gutpela long yu i givim baksait long Jisas.

*“Tasol nau, Em (God) i tok strong long olgeta man long olgeta hap bilong dispela graun olsem, “Yupela i mas tanim bel.” Long wanem? Em i bin makim wanpela de we Em bai kotim olgeta manmeri. Em bai mekim olsem long stretpela pasin bilong Em. Na Em i makim wanpela man na Em bai i stap jas long dispela kot. Na taim God i kirapim dispela man long matmat Em i soim olgeta manmeri dispela i tru tumas.”* **Aposel 17:30-31.**

**Orait. Yu bai mekim wanem?**

Yu bai tanim bel na i stap aninit long Jisas na bihainim Em o yu bai stap aninit long lek bilong yu na bihainim laik bilong yu i go yet?

Yu yet yu mas wokim disisen bilong yu.